

दिनांक 28.11.2024

समय: 18.45 बजे

आकाशवाणी जयपुर—अजमेर
प्रादेशिक समाचार

- जयपुर मांय 9 ऊं 11 दिसम्बर ताईं व्हेवण वाळी राइजिंग राजस्थान ग्लोबल इन्वेस्टमेंट समिट रा उद्घाटन सत्र मांय प्रधानमंत्री नरेन्द्र मोदी रो ई शिरकत करण रो कार्यक्रम।
- राष्ट्रपति द्रौपदी मुर्मू कह्यो— भारत री रक्षा क्षमता पूरी दुनिया रो ध्यान खींच्यो।
- प्रदेश मांय स्वास्थ्य सेवावां ने मजबूत बणावण रा मकसद ऊं चिकित्सा संस्थानां मांय वीडियो कॉल रे मार्फत औचक संवाद रो कार्यक्रम सुरु करी ज्यो।
- गोवा मांय 55वां भारतीय अंतरराष्ट्रीय फिल्म महोत्सव—इफ्फी आज शानदार जळसा सागे पूरो व्हेला।

000

प्रधानमंत्री नरेन्द्र मोदी दिसंबर महीना मांय व्हेवण वाळी राइजिंग राजस्थान ग्लोबल इन्वेस्टमेंट समिट रा उद्घाटन जळसा मांय शिरकत करेला। मुख्यमंत्री भजनलाल शर्मा आज खबरनवीसां ने आ जाणकारी दीनी। वे राइजिंग राजस्थान ग्लोबल इन्वेस्टमेंट समिट कामयाबी सागे करावण सारु आवता दस दिन ताईं रोजीना एक नुवो संकल्प लेवण रो ऐलाण कीनो। शर्मा कह्यो के पैला संकल्प रा तौर ऊं समिट रा उद्घाटन कार्यक्रम मांय केवल सूरज री रोशनी ऊं बणी बिजली काम ली जावेला। मुख्यमंत्री कह्यो के ओ सम्मेलन सूरज री ताकत ऊं प्रदेश रा विकास मांय नुवी सुबह लावेला। मुख्यमंत्री कह्यो के प्रदेश मांय लगातार बिजली री पूर्ति सारु सरकार अक्षय ऊर्जा ने बधावो देवण माथे खास ध्यान दे रही है। वे कह्यो के राजस्थान देश मांय अक्षय ऊर्जा बणावण रा मामला मांय अब्बल है। मुख्यमंत्री कह्यो के सरकार प्रदेश ने बिजली बणावण रा मामला मांय साल 2027 ताईं खुद रे पाण ऊबो करण री सोच सागे काम कर रही है। वे कह्यो के आं संकल्पां ऊं प्रदेश आवता पांच साल मांय साढे तीन सौ बिलियन डॉलर वाळी माली व्यवस्था बण जावेला। मुख्यमंत्री आज सीतापुरा मांय आयोजन री ठोड़ जा र सम्मेलन री तैयारियां रो जायजो लीनो अर अहलकारां ने जरूरी हुकम दीना। मुख्यमंत्री आज राइजिंग राजस्थान इन्वेस्टमेंट समिट री तैयारियां रो जायजो लेवण सारु बस मांय सवार व्हे र जयपुर शहर रो दौरा कीनो। वे अहलकारां ने साफ-सफाई, आवण-जावण री व्यवस्था, सड़कां ने बेहतर बणावण, शहर ने रूपाळो बणावण समेत न्यारा-न्यारा मुद्दां माथे लगातार निगराणी राखण रा हुकम दीना। ई पाछे खबरनवीसां सागे बातचीत करता थकां कह्यो के प्रदेश मांय निवेश री अपार संभावनावां है अर ओ आयोजन राज्य री औद्योगिक बरकत ने और तेज करण मांय मील रो भाटो साबित व्हेला।

000

राष्ट्रपति द्रौपदी मुर्मू कह्यो है के भारत री रक्षा क्षमता पूरी दुनिया रो ध्यान खींच्यो है। वे वेलिंगटन ऊटी मांय डिफेंस सर्विसेज स्टाफ ट्रेनिंग कॉलेज मांय बोल रही ही। राष्ट्रपति कह्यो के रक्षा बलां मांय महिलावां री भागीदारी माथे देश ने नाज़ है। राष्ट्रपति देश रा रक्षा उत्पादां री गुणवत्ता री सराहवणा करता थकां कह्यो के भारत रक्षा हलका मांय खुद रे पाण ऊबो व्हे रह्यो है अर अठे ऊं 100 ऊं बत्ता देशां ने रक्षा उपकरण बेचा जा रह्या है।

000

उपमुख्यमंत्री दिया कुमारी केन्द्रीय सड़क परिवहन अर राजमार्ग मंत्री नितिन गडकरी सागे मुलाकात कर र वां ने प्रदेश मांय हाई-वे रा विकास सारु वां कानी ऊं करी ज्यी मदद सारु धन्यवाद दीनो। वे राज्य मांय सेन्ट्रल रोड एंड इन्फ्रास्ट्रक्चर फंड—सीआरआईएफ ऊं और सड़कां मंजूर करण री मांग कीनी। दिया कुमारी

ब्रज-चौरासी परिक्रमा रा गेला रे नेशनल हाई-वे व्हेवण रो ऐलाण करण, ग्रीनफील्ड एक्सप्रेस-वे अर रोप-वे बणावण सागे विकास ऊं जुड्या न्यारा-न्यारा कामां सारु केंद्रीय मंत्री ऊं मदद मांगी।

000

देश मांय पी.एम. विश्वकर्मा योजना रा तहत करीब 25 लाख लोग नाम मंडाया है। सूक्ष्म, लघु अर मध्यम उद्यम राज्यमंत्री शोभा करंदलाजे आज लोकसभा मांय एक सवाल रा लिखित जवाब मांय आ जाणकारी दीनी। वे कह्यो के इण रो मकसद 18 भांत रा कारोबारां मांय लाग्योड़ा कारीगरां अर शिल्पियां ने मदद मुहैया करावणो है। करंदलाजे कह्यो के सितंबर 2023 ऊं अक्टूबर 2024 ताई पीएम विश्वकर्मा योजना रा तहत दो हजार 122 करोड़ रुपया ऊं बत्ती रकम मंजूर करीजी है। वे बतायो के सरकार ई योजना रा तैत 30 लाख कारीगरां रा नाम मांडणो तैय कीनो है।

000

श्रम अर रोजगार मंत्री मनसुख मांडविया आज राज्यसभा मांय बतायो के असंगठित हलका रा 30 करोड़ 40 लाख ऊं बत्ता मजूर ई-श्रम पोर्टल माथे नाम मंडाया है। राज्यसभा मांय एक सवाल रा लिखित जवाब मांय मांडविया बतायो के खुद री जिम्मेदारी परां असंगठित हलका रो कोई ई मजूर ई पोर्टल माथे नाम मंडा सके है। असंगठित हलका रा मजूरां रा बारा मांय देशभर ऊं जाणकारी हासिल करण अर राष्ट्रीय डेटाबेस बणावण सारु सरकार साल 2021 मांय ई-श्रम पोर्टल री सुरुआत कीनी ही।

000

प्रदेश मांय स्वास्थ्य सुबीता ने मजबूत बणावण सारु तकनीकी नवाचार कर्या जा रह्या है। इण ई कड़ी मांय विभाग चिकित्सा संस्थानां मांय वीडियो कॉल रे मार्फत सीधो औचक संवाद सुरु कीनो है। चिकित्सा अर स्वास्थ्य विभाग री प्रमुख शासन सचिव गायत्री राठौड़ ई नवाचार री सुरुआत बालोतरा जिला रा जसोल हलका रा आयुष्मान आरोग्य मंदिर मूंगड़ा मांय वीडियो कॉल कर र कीनी।

वे अलवर जिला रा लक्ष्मणगढ़ ब्लॉक, बारां जिला रा अटरू, चूरू जिला रा सरदार शहर, डीग जिला रा नगर अर ब्यावर जिला रा जैतारण ब्लॉक रा चिकित्सा संस्थानां मांय वीडियो कॉल कर स्वास्थ्य सुबीता रो जायजो लीनो। श्रीमती राठौड़ डॉक्टरां, नर्सिंग स्टाफ अर महिला स्वास्थ्य कार्यकर्तावां ऊं संस्थानां मांय दी जा रही सेवावां रा बारा मांय जाणकारी लीनी अर ज़रूरी हुकम दीना।

000

गोवा मांय राख्यी ज्यो 55वों भारतीय अंतरराष्ट्रीय फिल्म महोत्सव-इफ्फी आज रंगारंग जळसा सागे पूरो व्हे रह्यो है। समापन समारोह मांय भारतीय सिनेमा री केई नामी हस्तियां ई सिरकत करेला। कार्यक्रम मांय नामी गोल्डन पिक्कॉक समेत केई ईनाम दिया जावेला। ईनाम जीतण री होड़ मांय भारत री तीन फिल्मां समेत 15 फिल्मां शामिल है। नौ दिन ताई चाल्या ई फिल्मोत्सव मांय केई सांस्कृतिक अर संगीत रा कार्यक्रम राख्यी ज्यो। इफ्फी मांय न्यारी-न्यारी भाषावां अर शैलियां री करीब 180 फिल्मां रो दरसाव करी ज्यो।

000

बाल विवाह मुक्त भारत अभियान रा तैत प्रदेश मांय न्यारा-न्यारा कार्यक्रम राख्या जा रह्या है। भरतपुर मांय एस.पी. मृदुल कच्छावा बालपणा मांय ब्याह रा मामला खत्म करण बाबत् जाग जगावण री शपथ दिरायी। बयाना मांय विधिक सेवा प्राधिकरण रा सचिव अनुतोष गुप्ता बाल विवाह मुक्त भारत पोस्टर रो विमोचन कीनो। वठे विधिक सेवा प्राधिकरण री ओर ऊं कार्यशाला ई राख्यी ज्यी, जिण मांय बाल विवाह मुक्त भारत, बाल तस्करी, पोक्सो कानून अर पीडित प्रतिकर योजना रा बारा मांय जाणकारी दीरीजी अर बालपणा मांय ब्याह रा नुकसान रा बारा मांय बतायी ज्यो। कार्यशाला मांय टाबरां रा ब्याह व्हेवण रा हालात मांय पुलिस अर प्रशासन ने तुरत जाणकारी देवण री अपील करी ज्यी। पाली जिला मांय निंबाड़ा री सरकारी प्राइमरी स्कूल मांय जागरुकता कार्यक्रम राख्यी ज्यो। इण मांय बच्चां ने बाल विवाह रा नुकसान अर इण ऊं जुड़ी कानूनी जानकारी दीरीजी। सवाईमाधोपुर मांय बाल विवाह मुक्त भारत-राष्ट्रीय अभियान रा बारा मांय कार्यशाला राख्यी ज्यी। और जाणकारी म्हारा खबरनवीस ऊं-

.....

बाड़मेर रा आदर्श स्टेडियम मांय महिलावां ने टाबर-टाबरियां रा ब्याह रोकण री शपथ दिरायी ज्यी।

000

केंद्रीय जनजाति कार्य मंत्रालय रा भारतीय जनजातीय सहकारी विपणन विकास परिसंघ -ट्राइफेड री ओर ऊं जयपुर मांय काल आदि महोत्सव राख्यो जावेला। दस दिन रो ओ महोत्सव जनजातीय गौरव दिवस वर्ष

2024 रा सिलसिला मांय राख्यो जा रह्यो है। ट्राइफेड रा क्षेत्रीय प्रबंधक संदीप शर्मा बतायो के जयपुर मांय जवाहर कला केन्द्र रा शिल्पग्राम मांय राख्या जावण वाळा ई महोत्सव रो उद्घाटन राज्यपाल हरिभाऊ बागडे करेला। महोत्सव मांय हर शाम जनजातीय सांस्कृतिक कार्यक्रम ई राख्या जावेला। इण मांय राजस्थान, हिमाचल प्रदेश, पश्चिम बंगाल, मध्यप्रदेश, गुजरात, छत्तीसगढ़, उत्तराखण्ड अर पूर्वोत्तर राज्यां रा जनजातीय कारीगर अर शिल्पकार सिरकत करेला। महोत्सव मांय 120 स्टॉल्स रे मार्फत जनजातीय शिल्पकारां कानी ऊं बणायी ज्या सामान रो दरसाव कर्यो जावेला।

000

इंदिरा गांधी राष्ट्रीय मुक्त विश्वविद्यालय –इग्नू रा स्नातक, स्नातकोत्तर, डिप्लोमा, पीजी डिप्लोमा अर सर्टिफिकेट कोर्स रा इम्तिहान 2 दिसम्बर 2024 ऊं 9 जनवरी 2025 ताई चालेला। विद्यार्थी इग्नू री वेबसाइट ऊं प्रवेश पत्र डाउनलोड कर सके है। जेल मांय रह रह्या कैदियां सारू ई परीक्षा केन्द्र बणायी ज्या है। विद्यार्थियां ने सेन्टर माथे आधा घंटा पैली पूगण अर प्रवेश पत्र अर पहचान पत्र ले जावण री राय दीरीजी है।

000

बाड़मेर जिला मांय विमुक्त, घुमंतु अर अर्द्ध घुमंतु समुदायां रा लोगां ने न्यारी-न्यारी सरकारी योजनावां रो फायदो लेवण अर वां रा ज़रूरी कागजात बणावण सारू नगर परिषद् अर पंचायत समिति लेवल माथे आवता महीना री 9 तारीख ताई शिविर लगाया जावेला। पेश है म्हाणा खबरनवीस री रपट—

.....

000